

**Umno P. Pinang Kesal Dengan Kenyataan Timbalan Ketua Menteri Dalam Isu YDP  
MAINPP  
Bernama  
19 April , 2012**

GEORGE TOWN, 19 April (Bernama) -- Umno Pulau Pinang kesal dan kecewa dengan kenyataan Timbalan Ketua Menteri I Datuk Mansor Osman berhubung pelantikan Yang Dipertua Majlis Agama Islam Negeri Pulau Pinang (MAINPP).

Menyifatkan kenyataan itu sebagai sandiwara politik yang tidak boleh diterima, Pengerusi Umno negeri Datuk Zainal Abidin Osman berkata alasan yang diberi pemimpin kerajaan negeri terbabit amat sukar diterima.

"Mana mungkin soal yang begitu penting bersangkutan tentang hal ehwal agama negeri Pulau Pinang berlaku kesilapan yang begitu rupa?.

"Ini bukan perkara main-main, ini bukan perkara yang boleh kita buat salah silap. Bagaimana mungkin kita nak mentadbir hal-hal agama Islam negeri Pulau Pinang kalau benda semudah nak menamakan Yang Dipertua pun kita buat silap?," katanya pada sidang media di sini Khamis.

Beliau mengulas kenyataan Mansor yang menyatakan kerajaan negeri melakukan kesilapan ketika mengemukakan nama Pengerusi Jawatankuasa Hal Ehwal Agama, Perdagangan Dalam Negeri dan Hal Ehwal Pengguna negeri Abdul Malik Abul Kassim sebagai Yang Dipertua MAINPP dan diperkenan Yang di-Pertuan Agong.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=660426>